



Menntaskóli í tónlist

Ársskýrsla 2024-2025

MÍT ER EINSTAKUR SKÓLI

Í MÍT, fyrsta og eina tónlistarframhaldsskóla landsins, fara saman sköpunargleði, metnaður, ástríða og áhugi á tónlist. Skólinn leggur áherslu á einstaklingsmiðað nám og persónulegan þroska hvers nemanda. Nemendur koma víða að með fjölbreyttan tónlistarbakgrunn en eiga það sameiginlegt að hafa þegar náð umtalsverðri færni í hljóðfæraleik, söng og tónlistarsköpun og vilja bæta sig enn frekar. Námið er á framhaldsskólastigi og tekur mið af aðalnámsskrá tónlistarskóla, með sterka áherslu á hljóðfæraleik og söng. Skólinn býður upp á fjölbreyttar námsgreinar, bæði hefðbundnar fræðigreinar og nýsköpunarnám eins og hljóðtækni og verkefnastjórnun. MÍT er vettvangur þar sem tengslanet og vinátta mótask og fylgir nemendum áfram út í lífið og tónlistarsamfélag landsins.

HLUTVERK MÍT

Í MÍT eru nemendur undirbúnir undir háskólanám og atvinnulíf í tónlist. Skólinn veitir einnig almenna menntun sem nýtist nemendum óháð því hvort þeir stefni á framhaldsnám í tónlist eða stefni annað. Fjölbreytt námsframboð í klassískri og rytmískri tónlist gerir nemendum kleift að mótað námið eftir eigin áhuga og styrkleikum. Skólinn tekur virkan þátt í þróun tónlistarlífs og iðnaðar og vinnur markvisst að því að tengjast fjölbreyttum aðilum innan greinarinnar.


MARKMIÐ MÍT

Markmið skólans er að vera miðstöð tónlistarmenntunar á framhaldsskólastigi og veita tónlistarnemum þjálfun, stuðning og fræðslu sem gerir þeim kleift að þroskast sem listamenn og skapandi einstaklingar. Með því að bjóða upp á fjölbreytt og krefjandi nám á framhaldsskólastigi – með áherslu á samleik, samvinnu, hljómsveitarþjálfun og trausta fræðimenntun – er lagður grunnur að frekara námi og störfum innan tónlistar. Skólinn stefnir að því að stuðla að aukinni hæfni, víðtækri menntun og hagnýtum tengingum við atvinnulíf tónlistar.



HVERT LEIÐIR MÍT?

MÍT útskrifar nemendur með öflugan tónlistargrunn, færni og þekkingu sem getur veitt aðgang að Listaháskóla Íslands, tónlistarháskólum erlendis eða beint inn í hringið tónlistarlífsins. Einnig veitir stúdentspróf skólans aðgang að fjölbreyttu háskólanámi á sviði félags-, mennta- og hugvísinda.



A photograph of a group of young people, likely students, sitting in a music room and playing cellos. They are arranged in rows, with some in the foreground and others in the background. The room has wooden walls and floors. The text "NÁMSBRAUTIR MÍT" is overlaid in the center of the image.

NÁMSBRAUTIR MÍT

NÁM TIL STÚDENTSPRÓFS (200 fein)

Stúdentsbrautir MÍT bjóða upp á spennandi nám til stúdentsprófs þar sem höfuðáhersla er á tónlist. Nemendur á stúdentsbrautum stunda almenna bóknámsáfanga við Menntaskólann við Hamrahlíð, eða aðra framhaldsskóla sem bjóða upp á nám við hæfi nemandans.

1. Stúdentsbraut – klassísk tónlist
2. Stúdentsbraut – rytmísk tónlist (jazz)
3. Stúdentsbraut – rytmísk tónlist (popplína)





NÁM TIL LOKAPRÓFS Á 3. HÆFNIÐREPI (150 fein)

Brautirnar henta þeim sem hafa áhuga á að stunda áhugavert og krefjandi tónlistarnám á framhaldsstigi. Námslok brautanna eru á 3. hæfniðrepi og opna leiðir inn í framhaldsnám á sviði tónlistar.

1. Almenn braut – klassísk tónlist
2. Almenn braut – rytmísk tónlist (jazz)
3. Almenn braut – rytmísk tónlist (popplína)

KENNDAR EININGAR OG FJÖLDI KENNDRA HÓPA 2024–2025

Heildarfjöldi eininga: 11.318

Kenndir hópar á viku

Haustönn 2024

MÍT einingar alls: 5085

MH einingar alls: 605

Alls: 5690

Vorönn 2025

MÍT einingar alls: 5136

MH einingar alls: 492

Alls: 5628

Haustönn 2024

Einkatímar: 362

Hóptímar: 73

Vorönn 2025

Einkatímar: 353

Hóptímar: 76

Nemendur MÍT

Alls stunduðu 208 nemendur nám við MÍT haustið '24 og 197 nemendur vorið '25.

Braut	Haut 24	Vor 25
Klassísk tónlistarbraut (stúdent) KTS	18	19
Rytmísk tónlistarbraut – popplína (stúdent) RSP	33	30
Rytmísk tónlistarbraut (stúdent) RTS	18	20
Klassísk tónlistarbraut (almenn) KTB	75	73
Rytmísk tónlistarbraut–popplína (almenn) RTP	22	21
Rytmísk tónlistarbraut (almenn) RTB	21	19
Fjar- og gestanám FN	21	15



STJÓRNUN OG SKIPULAG

STJÓRNUN OG SKIPULAG

Menntaskóli í Tónlist starfar í samræmi við lög um rekstur framhaldsskóla og hefur hlotið viðurkenningu skv. 12. gr. framhaldsskólalaga. Skólinn er sjálfseignarstofnun frá 1. september 2016.

Freyja Gunnlaugsdóttir var ráðin í stöðu skólameistara MÍT vorið 2021. Sólrún

Sumarliðadóttir sem áður gengdi starfi áfangastjóra var ráðin í starf

aðstoðarskólameistara haustið 2022. Andrés Þór Gunnlaugsson starfar sem deildarstjóri

rytmískrar deildar frá janúar 2023, Birna Hallgrímsdóttir deildarstjóri klassískrar deildar


frá hausti 2023. Þóra Björt Sveinsdóttir hefur starfað sem áfangastjóri frá hausti 2022 og

bætti við sig stöðuhlutfalli námsráðgjafa haustið 2023. Freyja Gunnlaugsdóttir var í




barneignarleyfi frá ágúst 2024 til og með apríl 2025 en Sólrún Sumarliðadóttir leysti

hana af þann tíma. Þóra Björt Sveinsdóttir tók að sér hluta starfa aðstoðarskólameistara

á tímabilinu þar sem ekki var ráðin afleysing í stöðu aðstoðarskólameistara.



SKIPURIT MÍT



Starfsfólk við skólann á
haustönn 2024 var alls 75 í
27,9 stöðuhlutföllum. Þar af
35 konur og 40 karlmenn.





STJÓRN MÍT

Ari Daníelsson, stjórnarformaður

Ólafur Óskar Axelsson

Gunnar Kvaran Hrafnsson

Guðlaug Dröfn Ólafsdóttir

Víðir Smári Petersen

Varamenn

Birna Hallgrímsdóttir

Helgi Hrafn Jónsson

A close-up photograph of a person's hands playing a piano. The person is wearing a brown long-sleeved shirt. Their left hand is on the lower keys, and their right hand is on the upper keys. A red string is visible on the piano's keyboard. In the background, there is a stack of white sheet music. The text "STEFNUMÓTUN OG SJÁLFSMAT" is overlaid in white, bold, sans-serif font in the center of the image.

STEFNUMÓTUN OG SJÁLFSMAT

SJÁLFSMAT OG EFTIRFYLGNI

Skólaárið 2024–2025 var kannað viðhorf nemenda til námsins og félagslegra tengsla í skólanum. Lögð var fyrir ein könnun á haustönn, svarhlutfall var 45%. Jákvæð breyting var milli skólaára á líðan nemenda og félagslegum tengslum í skólanum.


Fyrir utan hefðbundna kennarafundi á skólaárinun var haldinn vinnudagur í október þar kennarar skólans og stjórnendur unnu saman að framtíðarsýn skólans og þróun nýrrar starfsáætlunar. Lokahönd verður lögð á gerð starfsáætlunar MÍT 2025–2028 á vordögum.



JAFNRÉTTISÁÆTLUN OG JAFNLAUNAVOTTUN

Jafnréttisáætlun MÍT var samþykkt af Jafnréttisstofu og Mennta- og menningarmálaráðuneytinu vorið 2021 og var í gildi til 2024. Unnið er að uppfærslu áætlunarinnar. Jafnréttisáætlun Menntaskóla í tónlist byggir á lögum nr. 10/2008 um jafna stöðu og jafnan rétt kvenna og karla og á annars vegar um skólann sem vinnustað og hins vegar um skólann sem menntastofnun. Skólinn hefur markvisst unnið að markmiðum áætlunarinnar, m.a. með fræðslufundum og námskeiðum fyrir starfsfólk skólans.

Skólinn hlaut jafnlaunavottun í nóvember 2023 og uppfyllir þar með kröfur sem tilgreindar eru í staðlinum ÍST 85:2012. Viðhaldsúttekt fór fram í mars 2025 með jákvæðri niðurstöðu.



JAFNLAUNAVOTTUN
2023 - 2026

SKÓLASTARF 24-25



VIÐBURÐIR – RYTMÍSK DEILD

Rytmíska deildin stóð fyrir öflugum tónleikahaldi með fjölbreyttri dagskrá, sem einkenndist af skapandi samvinnu og samstarfi við íslenska og erlenda aðila í tónlistarlífinu. Haustið hófst með glæsilegri þátttöku í Jazzhátíð Reykjavíkur, þar sem haldnir voru masterklassar með Jens Larsen og Chris Speed, auk *MÍT Showcase* tónleika. Í september fengu nemendur að kynna þremur framúrskarandi gestakennurum, Óskari Guðjónssyni, Thomas Morgan og Jorge Rossy, í samstarfi við LHÍ, og í lok mánaðar heimsóttu gítarleikarinn Mike Stern og tónlistarkonan Leni Stern í samstarfi við Tónlistarskóla Hafnarfjarðar og fleiri skóla.

Á vetrarmánuðum fóru fram samspilskvöld, söngdeildartónleikar og stór sýningarverkefni, þar á meðal söngsýningin *Björk* í nóvember og *Bítlaæði* í mars. Þá fékk deildin til sín stórsveit frá Sankt Annæ í Danmörku, sem ásamt Stórsveit MÍT hélt stórtónleika í mars. Fjölmargar tónleikaraðir samspilshópa voru dreifðar yfir veturinn, og sýndu þær styrk og fjölbreytileika deildarinnar.

Á vordögum tóku nemendur þátt í *Rvk Folk Festival*, tónleikum Stórsveitar MÍT í Jazzþorpinu í Garðabæ, vinnustofu með sænska orgelleikaranum Andreas Hellkvist og uppsetningu á *Diskóeyjunni* í samstarfi við Menntaskólann við Hamrahlíð.





VIÐBURÐIR – KLASSÍSK DEILD

Haust- og vetrarmánuðirnir voru einstaklega viðburðaríkir hjá klassískri deild MÍT, og einkenndust af fjölbreyttu tónleikahaldi, masterklössum og alþjóðlegu samstarfi. Innlendir og erlendir gestir heimsóttu skólann, þar á meðal Ari Vilhjálmsson fiðluleikari, Bernharð Wilkinson flautuleikari, Polina Fradkin píanóleikari, Sergio Coto gítarleikari, Mathias Halvorsen píanóleikari og Johannes Hinterholzer hornleikari. Einnig tókum við á móti góðum gestum frá skólum í Portúgal og Svíþjóð.

Nemendur komu víða fram á tónleikum, jafnt innan skólans og í tónleikahúsum borgarinnar. Hápunktar voru meðal annars þátttaka í Myrkum músíkdögum, Kammertónleikar blásara og strengja, framhaldsprófstónleikar, píanóhátíðin *Slagharpan syngur*, og útskriftarhátíðin í Hörpu í mars.

Á árinu tóku kennarar og nemendur einnig þátt í alþjóðlegri ráðstefnu ECTMA í Gautaborg, og heimsóknir milli skóla sköpuðu tækifæri til miðlunar þekkingar og innblásturs.

ÚTSKRIFTARHÁTÍÐ í Hörpu

Vorið 2025 var í annað sinn haldin vegleg tónlistarveisla í Hörpu, en glæsilegur hópur nemenda lýkur námi frá skólanum í vor. Útskriftir af brautum skólans voru 31 á skólaárinu, þar af 15 stúdentar.


Dagana 31. mars – 2. apríl fóru fram tónleikar í tveimur sölum Hörpu, Kaldalóni og Norðurljósum á klukkustundar fresti frá kl 11 að morgni til kl 21 að kvöldi. Hátíðin tókst einstaklega vel og gleðilegt að sjá nemendur skólans taka örugg fyrstu skref í tónlistarhúsi þjóðarinnar.

Mikið af frumsaminni tónlist var flutt á tónleikunum og gefin út á upptöku og greinilegt íslenskt tónlistarlíf þarf ekki að kvíða framtíðinni. Margir efnilegir hljóðfæraleikarar, söngvarar, tón- og lagasmiðir og aðrir tilvonandi þátttakendur í tónlistarlífi landsins útskrifuðust frá MÍT í vor og þau munu taka þátt í að byggja upp íslenskt tónlistarlíf á komandi árum.



HVAÐ TEKUR VIÐ EFTIR ÚTSKRIFT FRÁ MÍT?

Skv. könnun sem lögð var fyrir útskriftarefni vorið 2025 stefnir stór hluti nemenda að framhaldsnámi í tónlist, ýmist við LHÍ eða tónlistarháskóla erlendis. Mörgum nemendanna hefur verið boðið námspláss við virta tónlistarháskóla erlendis á borð við Royal College of Music í London, Berklee College of Music, Curtis Institute of Music (USA), BIMM Music institute og ICMP Koninklijk Conservatorium den Haag (NL), Manhattan School of Music (USA), Conservatorium van Amsterdam (NL), KMH í Stokkhólmi (SE) og Konunglega danska tónlistarháskólann (DK) og verður spennandi að fylgjast með vegferð þeirra á næstu árum. Aðrir nemendur sjá fyrir sér að fara beint að vinna við tónlist að loknu námi við tónlistarkennslu, tónlistarflutning, tónsmíðar, hljóðtæknitengdar greinar, umboðsmennsku, bókun og fleira.



HÚSNÆÐISMÁL MÍT

MÍT býr að miklum mannauði, bæði nemendum, kennurum og öðru starfsfólki skólans en það er verulega aðkallandi að skólinn komist sem fyrst undir eitt þak í húsnæði sem hentar starfseminni.

Klassísk deild og skrifstofur skólans eru staðsettar í Skipholti 33 (alls 793 m²)

Rytmísk deild skólans er staðsett í Rauðagerði 27 (alls um 1400 m²) sem er mikið samnýtt með tónlistarskóla FÍH og stéttarfélagi FÍH (bæði skrifstofur félagsins og æfingaraðstaða fyrir félagsmenn FÍH sem eru 750 talsins). Mjög þröngt er um skólastarfið í því húsnæði.

Mikill hluti skólastarfsins fer fram í einkatímum og því enn mikilvægara en í hefðbundnu framhaldsskólanámi að hlú að skólaanda og félagslegum þáttum skólastarfsins sem meðal annars húsnæði hefur mikil áhrif á.

Unnið hefur verið að ýmsum hugmyndum varðandi húsnæðismál skólans undanfarin ár, en enn hefur ekki tekist að koma því í góðan farveg. Vonir standa til þess að yfirvöld muni stíga öruggar inn í það að koma skólanum í ásættanlegt húsnæði sem sómir þessu blómlega skólastarfi sem er mikilvægur grunnur að tónlistarlífi landsins, en ríkið hafði frumkvæði að stofnun skólans.

FÉLAGSSTARF NEMENDA

Nemendafélag MÍT stóð fyrir fjölda viðburða á árinu og setti kraftmikinn og líflegan svip á skólastarfið og skólabrag.

Nýnemar voru boðnir velkomnir í ágúst með busakvöldi og öðru sprelli. Haldin voru regluleg ís-, föndur- og bíókvöld í húsnæði skólans í Skipholti og haldin regluleg „jam session“ sem voru vel sótt af nemendum innan og utan skólans. Auk þess voru stærri viðburðir á borð við samspilskvöld (jam session), vel heppnaða árshátíð, lagasmíðakeppni, söngkeppni og fleira. Nemendafélagið stóð einnig fyrir útgáfu nemendaskírteina, hönnun og sölu skólapeysu og veitingasölu á söngsýningum skólans.



FORELDRASAMSTARF

Kosið var í nýja stjórn foreldrafélags MÍT haustið 2024. Tilgangur foreldraráðs er að stuðla að auknum gæðum skólans og leitast við að bæta jafnt almenn skilyrði og aðstæður nemenda til menntunar og almenns þroska. Markmiðum sínum hyggst félagið ná með því meðal annars:

- Að stuðla að aukinni vitund foreldra/forráðamanna um forsjárskyldur sínar og þekkingu þeirra á réttindum og skyldum sínum og barna þeirra.
- Að efla samstarf milli foreldra um málefni sem varða velferð, menntun og þroska nemenda.
- Að vera vettvangur samstarfs og samráðs foreldra og forráðamanna nemenda.
- Að auka sýnileika og nánd foreldra/forráðamanna sem veiti yfirvöldum, skólastjórnendum, kennurum og nemendum stuðning í skólastarfinu.
- Að stuðla að góðu samstarfi foreldra og forráðamanna, nemendafélaga og starfsfólks skólans.
- Að skapa farveg fyrir samskipti við stjórnendur skólans um málefni og hagsmuni ólögráða nemenda sérstaklega, bæði gagnvart námsaðstæðum og þjónustu af hálfu skólans.
- Að hvetja til aukins stuðnings og hvatningar foreldra/forráðamanna við börn sín og nám þeirra.
- Að vera bakhjarl skólans og auka áhrif foreldra/forráðamanna sem hagsmunahóps um bættan hag og stöðu skólans.

SAMSTARFSVERKEFNI

Skólastjórnendur hafa sett þá stefnu að auka markvisst samstarf við aðra skóla, stofnanir og tónlistarhátíðir.

Náið samstarf Menntaskólans við Hamrahlíð og MÍT heldur áfram, bæði um aðgengi MÍT nemenda á stúdentsbraut að kjarnaáföngum í MH, en einnig að félagslífi, kórstarfi og stoðþjónustu. Á vorönn átti sér einnig stað mjög velheppnað samstarf um uppsetningu á sögnleiknum Diskóeyjunni, en nemendur MÍT sáu um hljómsveitarleik og voru einnig í burðarhlutverkum í sýningunni.

MÍT á einnig í samstarfi við aðra framhaldsskóla vegna nemenda á stúdentsbrautum, en hluti nemenda á stúdentsbrautum MÍT stundar almenna bóknámsáfanga við aðra skóla ýmist í fjar- eða staðnámi. Samstarf við tónlistarskóla FÍH heldur áfram, m.a. um masterklassa og aðra þætti skólastarfsins í rytmísku deildinni.

Vel heppnað samstarf MÍT og Borgarholtsskóla heldur áfram, en nemendur í verkefnastjórnun hafa unnið með nemendum Borgarholtsskóla í grafískri hönnun að verkefnum tengdum sönguppfærslu rytmískrar deildar á vorönn.

Samstarf við Sinfóníuhljómsveit Íslands var eftt með formlegum hætti, en MÍT er skilgreindur sem "heimaskóli" SÍ. Samstarf er um ýmislegt sem tengist Ungsveit SÍ, masterklassa, tónleikasókn nemenda, heimsóknir nemenda á æfingar SÍ og samvinnun verkefna í MÍT áföngum við starf sinfóníunnar.

SAMSTARFSVERKEFNI frh.

- Samstarf við LHÍ var talsvert á árinu, en skólarnir stóðu m.a. sameiginlega að nemendatónleikum, masterklössum og áttu einnig samstarf um kammertónlistarkennslu. Einnig höfum við tekið á móti kennaranemum í æfingakennslu og áhorf bæði frá kennaradeildum LHÍ og Menntavísindasviði Háskóla Íslands.
- Gott samstarf var við Skólahljómsveitir Reykjavíkurborgar um samspil nemenda, en skólahljómsveitum bauðst að senda langt komna nemendur í stórsveit MÍT. Í undirbúningi hefur einnig verið stofnun Blásarasveitar MÍT sem unnin verður í samvinnu við skólahljómsveitirnar á höfuðborgarsvæðinu.
- Samstarf við Myrka músíkdaga hélt áfram í vetur í formi veglegra tónleika nemenda MÍT á hátíðinni, og er stefnt að áframhaldandi samstarfi. Vonast er til að virkja samstarf við enn fleiri stofnanir og aðila í tónlistarlífinu í nágrenni framtíð.
- Samtal og vísir að samvinnu við Sankt Annae tónlistarmenntaskólann í Kaupmannahöfn hélt áfram á árinu með heimsókn stórsveitar Sankt Annae til Íslands og sameiginlegum tónleikum stórsveita skólanna tveggja. Samstarfinu verður haldið áfram.
- MÍT gerðist meðlimur ECMTA (European Chamber Music teachers Association) á liðnu ári og sótti ráðstefnu í Gautaborg. Nemendur og kennarar munu taka þátt í viðburðum samtakana á næsta skólaári.
- Kennarahópur frá tónlistarmenntaskólanum Escola Artística Conservatório de Música Calouste Gulbenkian í Braga, Portúgal, heimsótti MÍT á árinu. Stefnt er að heimsókn til skólans á næsta skólaári.

LOKAORÐ

Nú er MÍT að ljúka sínu áttunda starfsári. Mikil uppbygging og nýsköpun í skólastarfi hefur átt sér stað á þessum tíma þó skólastarfið sé enn í sífelldri mótun. Smám saman hefur skólinn fest rætur og gegnir nú þegar lykilhlutverki í tónlistarmenntun á Íslandi. Í skólanum koma saman um 200 nemendur sem allir leggja stund á tónlist af ástríðu og áhuga. Fjölbreytt námsframboð skólans gefur þeim tækifæri á einstaklingsmiðuðu námi þar sem þau geta mótað námið að eigin áhugasviði og hæfileikum. Kennarar og starfsfólk skólans hafa lagst á eitt við að byggja upp faglegt og jákvætt lærdómssamfélag þar sem nemendur fá að þroskast og vaxa sem manneskjur og tónlistarfólk.

Skólinn stendur vissulega frammi fyrir krefjandi áskorunum, þar er ekki síst mikilvægt að koma skólanum undir eitt þak svo skólinn geti orðið sú heilsteypta menntastofnun í tónlist sem stefnt er að með öflugri klassískri og rytmískri deild undir sama þaki. Stjórnendur skólans og kennaralið vinnur samhent og af heilum hug að því að byggja upp enn sterkari framhaldsskóla sem mun festa sig í sessi til framtíðar sem lykilstofnun í íslensku tónlistarlífi.





Menntaskóli í tónlist



Skipholti 33, 105 Reykjavík

menton@menton.is

S: 589 1200

www.menton.is

Ljósmyndir: Thelma Arngrímsdóttir